



UNIVERSITÄTS-
BIBLIOTHEK
PADERBORN

Universitätsbibliothek Paderborn

Das new Testament recht grüntlich teutsch

Luther, Martin
Straßburg, 1524

VD16 B 4346

Das. XVII. Capitel.

urn:nbn:de:hbz:466:1-34848

Euangelion

zū im / Selig bistu Simon Jonas sūn / fleisch vnd blūt hat dir das nit of-
fenbart / sonder min vatter im himel / vnd ich sag auch dir / du bist^a Petrus /
vnd auff disen fels wil ich bauwen meine gemein / vnd die^b pforten der hel-
len sollen sy nicht überweltigen / vnd wil dir die schlüssel des hymelreichs
geben / Alles was du binden wirst auff erden / sol auch im hymel gebundē
sein / vnd alles was du auff^c den lösen wirst / sol auch im hymel lof sein.
^a C (Petrus) Cepha Syrisch / Petros Griechsch heist auff teutsch ein fels / Vnd alle Christen sind Pe-
tri vmb der bekantniß willen / die hie Petrus thür / welche ist der fels daruff Petrus vnd al Petri bau-
wet sind / gemein ist die bekantniß / also auch der nam. ^b C (helle pforten) Die helle pforten sind
aller gewalt wider die Christen / als sünd / todt helle / weltlich weisheit vnd gewalt.

^{Luc. 9.} Da verbot er seinen jüngeren / das sy niemant sagen solten / das er Jesus
Christus were. Von der zeit an sieng Jesus an vnd zeygt seinen jüngern /
wie er müßt gen Hierusalem geen / vnd vil leyden von den eltesten vnd ho-
hen priestern vnd schufftgeleerten / vnd getödtet / vnd am dritten tag auff er-
werckt werden. Vnd Petrus nam in zū sich / für in an / vnd sprach / Herz
schon dein selbs / das widerfar dir nun nicht. Aber er wandt sich vmb / vñ
sprach zū Petro / Heb dich Satan von mir / du bist mir ergerlich / denn du
meinst nicht das götlich / sonder das menschlich ist.

^{Marc. 8.} Do sprach Jesus zū seinen jüngern / Wil mir yemant nachfolgē / der ver-
^{Luc. 9.} leuckne sich selb / vnd neme sein creutz auff sich vnd folg mir. Den wer sein
leben wil erhalten / der wirts verlieren / wer aber sein leben verlürt vmb
meinet willen / der wirts finden / was hilffs den menschen / so er die ganze
welt gewünne / vnd nem doch schaden an seiner sel. Oder was kan der
mensch geben da mit er sein seel wider löfe / denn es wirt ye geschehen / das
des menschen sūn komm in der herligkeit seins vatters / mit seinen engeln /
vnd als dan / wirt er vergelten einem yeglichen nach seinen wercken. War-
lich ich sag euch / Es steen etlich hie die mitt schmecken werden * den todt /
bif das sy sehen kommen des menschen sūn in seinem reych.

* C (den todt) das ist / wer an mich glaubt werden todt nit sehen / Johannis. viij. xi. rñ.

Das. XVII. Capitel.

^{Marc. 9.} ^{Luc. 9.} **N**ach sechstagen nam Jesus zū sich
Petrum vnd Jacobum vnd Johannem seinen brüder / vnd fü-
ret sy beseyts vff einen hohen berg / vnd verkleeret sich inen / vnd
sen angesicht glantzte wie die sonn / vnd sein kleider worden
weyß / als ein licht / Vnd sihe / da erschynen in Moses vnd He-
lias / die redten mit im. Petrus aber antwortet vnd sprach zū Jesu / Herze
hie ist güt sein / wiltu / so wollen wir hie drey hütten machen / dir eine Mo-
se eine / vnd Helias eine. Do er noch also redte / sihe / da überschattet sy / ein
lichte wolcken / Vñ sihe / ein stinn vff 8 wolcken sprach / Das ist mein lieber
sūn in welchem ich ein wol gefallen hab / gehorchet im. Do das die jünger
^B horten / sielen sy vff ir angesicht / vnd erschrocken seer. Jesus aber trat zū
inen / rüret sy an / vnd sprach / steet vff / vnd fürcht euch nicht / Da sy aber in
augen vff haben / sahen sy niemant / denn Jesum allein.

D

Vnd do sy vom berg nider giengen/ gebot in Jesus/ vnd sprach/ Ir solt
dis gesicht niemant sagen/ bis des mensche sün von den todten vfferstan-
den ist/ Vnd seine jünger fragten in vnd sprachē/ was sagen den die schrif-
figelerten/ Helias müß zūuo: kömen? Jesus antwortet vnd sprach/ Helias
sol ja durch seine zükünfft alles zū recht bringen. Doch ich sag euch/ Es ist
Helias schon kommen/ vnd sy haben in nicht erkant/ sonder haben an im
than was sy wolten/ also wirt auch des mensche sün liden müssen von in/
Da verstanden die jünger/ das er von Johanne dem teuffer geredt hat.

Vnd da sy zū dem volck kamen/ trat zū im ein mensch/ vnd bog die knie
gegen im/ vnd sprach/ Herr erbarm dich über meinen sün/ denn er ist mon-
süchtig vnd hatt ein schweres leiden/ Er felt oft inß feur/ vnd oft inß
wasser/ vnd ich hab in zū deinen jünger bracht/ vnd sy künden im nicht
helffen. Jesus aber antwortet vnd sprach/ O du vnglaubige vnd verker-
te art/ wie lang sol ich bey euch sein? wie lang sol ich euch dulden? Bingt mit
in hieher/ Vnd Jesus bedauwet in/ vnd der teufel sür vß von im/ vnd der
knab ward gesundt zū der selbigen stund.

Do tratten zū im seine jünger/ besonders/ vnd sprachen/ Warumb künd-
ten wir in nit auftriben? Jesus aber antwortet vnd sprach/ Vmb euwers
vnglaubens willen/ Den ich sag euch warlich/ So ir glauben habent als
ein senff kom/ so mügt ir sage zū disem berg/ heb dich von hinnen dort hyn
so wirt er sich heben/ vnd euch wirt nichts vnmüglich sein/ aber dise art se-
et nicht vß/ denn durch betten vnd fasten.

Do sy aber ir wesen hattē in Galilea/ sprach Jesus zū in/ Es ist zükünfft
ig/ das des menschen sün überantwort werde in der menschen hende/ vñ
sy werden in todten/ vnd am dritten tag wirt er vffersteen/ vnd sy würdē
er betribt.

Do sy nun gen Capernaum kamē/ giengen zū Petro die den zins grosch-
in innamen/ vnd sprachen/ Plegt euwer meister mit den zins groschen zū
eben? Er sprach/ Ja/ Vnd als er heim kamē/ kam im Jesus zūuo: vnd
sprach/ Was dunckt dich Simon? Von wem nemen die künig vffer den
den zoll oder zins? von iren kunderen oder von frembden? Do sprach zū im
Petrus/ von den frembden. Jesus sprach zū im/ so sind die kunder * frey/ vff
das aber wie sy nicht ergern/ so gang hin an das meer/ vnd wirff den an-
zel/ vnd den erste fisch der auffer fert/ den nym/ vnd weñ du seinen mundt
vff thust/ wirtstu ein halben gulden fundē/ den selbigen nym/ Vnd gib in für
mich vnd dich.

* C (frey) wie wol Christus frey war/ gab er doch den zins/ sein nehesten zū willen/ also ist ein Chris-
ten seine halben alles dings frey/ vnd gibt sich doch seinem nesten willig zū dienst.

Das. XVIII. Capitel.

In der selbigen stund tratten die iunger
zū Jesu/ vñ sprachen/ Wer ist doch d grōst in hymelreich? vnd
Jesus rufft ein kind zū sich/ vñ stellet das mitten vnder sy/ vnd
C ij sprach/